


國朝耆獻類徵初編



明列女傳

國朝耆獻類徵初編卷三百八十五目錄

孝友十一

翁運槐

張淑旺

楊儀祖

潘德馨

周士晉

姚易修

王思文

嚴孝子

蕭啟聖
蕭鳳騰

鄭勤

金兆篁

楊楚

郭培壙

張燾
江大賓

邱永彰
劉必泰
胡士宏

施聖揆

張友璧
弟友軫
孫岳

軫子士聖

潘稷

龔汝璞

張文齡

沈澈

向大經

林長貴
林長廣

張錫璫

徐孝子

吳日孜

吳如慶

吳徵鏞

桑天顯

補錄

郭培墉

國朝耆獻類徵初編卷三百八十五

通奉大夫前署江西巡撫江西布政使司布政使湘陰李桓輯

孝友十一

翁運槐

孝子翁運槐字楫山弟運標字蓼野浙之餘姚人也二子當孩抱時父大環以妻兄鄔令恭城時債累有粵西之行次永州之新塘夜起登岸遂失所在蓋康熙三十一年十一月五日也同舟者卽恭城子索之不得還報狀妻鄔聞之提二子哭禱於神有意外得生還之兆日抱幼子嘯於庭曰兒他日能尋爾父歸來乎領之乃喜越三載鄔歿兄弟失依賴兩姊以活成童並自勵而母命尋親

兄與弟未嘗一日忘也。運標嘗訪其伯姊，猶記舟次新塘一詩末云：「霜濃古寺鐘開處，一點空明透佛鐙。」大環性靜穆，常作出世語，因以詩意合之，益信其了悟入山矣。於是兄弟往尋，不得，鄉人有估於楚者，挾之還。雍正元年，運標成進士，歸時，運槐舉一子，運標曰：「兄幸舉子，尋親不必待矣。」復卜於神，仍得前兆。兄弟喜甚，曰：「神豈終誑哉？」乃就密室，捆擔肩之盤旋，爲遠行計，誓不得父，則不返。人不知也。三年春，運標亦舉子。甫三日，兄弟託其妻子於兩姊，遂行。徒步負擔，測字餬口，或至乞。凡名山梵剎，崎嶇徧訪，每至卽刺臂血書疏，告於神。入楚，兄弟分尋一涉洞庭，一入衡山，半載會於粵西之湘山寺，相對泣，復商所往適。其友同里邵宏傑客永州，聞

之往訪皆驚黑骨立哀之因告曰事不求其原而僕僕道途卽斃
命何益觀兩君念誦之詩先生蓋絕筆於新塘也盍置一舟溯洞
衡永聞天憐兩君未必無默啟者舟成勝曰餘姚翁某兄弟尋父
之船楚人羣憐之祁陽烏窩民有鄭海還者聞之扶杖出江干候
二子指曰孝子爾欲生逢爾父我不敢知非然斯洲有瘞者爾父
也二子驚泣請故海還曰康熙三十一年十一月七日我弟海生
產男走告其外家渡江溺而格於敗葦起視葦中則赫然一人僵
矣弟念同患幸免出之岸畱其佩物擇阜瘞之後二載有恭城令
喪舫泊江干揭其貌詳其姓氏里居與相失之月日以訪比聞奔
告已去今海生死其妻尙存其子之生辰可稽距二日者汨於五

浮於七也又孝子所云與昔喪舫揭者同則瘞洲者非爾父而誰
二子泣曰似矣何以徵信海還乃問諸鄭子之母出小鑰示之曰
此亦瘞者佩物也其製摺疊而缺一齒運槐遣急足往餘姚證之
伯姊伯姊持之哭曰是也曩歸遺篋無鑰也以他物啟之乃得紀
行詩知絕筆於新塘也出遺篋鎖啟之牝牡合哭授急足還報於
是二子繞阜擗踊哀號慟哭幾絕觀者無不哭宏傑聞之亦至二
子欲開視遷葬宏傑不可曰三十餘年之久又無棺也且洲廣厚
而沙白地吉樹石表之可耳於是二子識之乃歸兆言得生還者
以海生海還也洲初小狹自瘞大環後沙日長數年外互以隄矣
土人名之曰白沙洲洲距祁陽二十里隔岸爲獅山運標以保舉

出今官河南桐柏縣中丞雅爾圖榜之曰純孝足風

張庚曰乾隆六年秋八月晤邵子慕梁

宏傑字

於睢州爲余語孝子

事甚悉並示送翁氏兄弟尋親序及白沙洲考嗚呼純孝若翁氏兄弟我無能贊一辭矣因節邵子之序與考而爲傳以誌余之嚮往云至關忠壯神兆之奇驗則大孝之格也

右傳張庚撰

翁氏兩孝子者長運槐次運標浙江餘姚人其父大環先生以康熙壬申役於粵西溺於湖南祁陽之新塘祁人鄭海生還生瘞之於白沙洲時運槐運標尚幼家之人皆莫知其親之死而疑其久不歸也二子稍長始蹤跡之不獲檢其遺歸篋中詩止於新塘乃

偕行楚粵間凡三十餘年而後遇還生既證驗遂號泣奉父骸以歸合窆於母墓而仍表其舊葬之處嗚呼異哉人之生死之情故莫重於父子其能相養以生相守以死牀第環向號泣得執手奉遺命歲時祭埽魂魄不去鄉里此人情所甚摯也若犇走別離不獲親視含殮道路遼闊音書日月真似不可必而其閒又有最不幸者或飄零搖落奄忽於荒江寂寞之濱雖終身物色莫可蹤跡萬一得之而面目骸骨不復辨爲何人者則又求其一人之證與一物之驗而亦不可得如翁氏二子者豈非積誠至孝之格天而能至於是者哉予嘗讀檀弓云孔子少孤不知其墓及殯母問於鄆曼父之母乃得合葬於防竊疑以孔子大聖豈有不求知其父

墓待母死而始問者固記禮者之誣今觀於翁氏之事然後知時
勢之睽阻亦有出於無可奈何者其孤行苦節尤可爲當世處人
倫之變而以不幸諉之於天者戒也先是二子母在時卜之於神
有意外生還之語母死二子皆有後乃決意行竟遇還生始知爲
識海生死還生證之有遺鑰焉走告其姊卽所從得新塘詩篋之
鑰也嗚呼其皆鬼神之爲耶抑其父之靈默有以啟之耶翁君旣
以羈旅詩人不得志而流落以死然古人之高才薄命遭此厄者
不可勝數如子美之在耒陽汨於方田之春漲今新塘去方田不
過數百里殆同一感慨而二子者以襁褓餘生兄弟共奮終已不
顧積數十年之力而卒就其志將天使厲二子之行以釋恨於先

生而二子之不幸者固天之所以成其名也然則翁君與二子皆可無恨也已邵裘兩君爲之序考以闡其德而發其光誠可謂有古人之風予不惟奇其事又以悲二子之志也故記其梗槩如此以俟後之表章者採擇焉

右紀事張九鐸撰

按孝子以年久地吉樹石表之未奉父骸歸鄭海生之弟名海還前傳親晤作

序考邵先生當確此篇以有論斷存之又翁君之弟運標別詳守令

張淑旺

張淑旺海豐人年九歲父存心商於塞外既行絕音耗淑旺依母以居旋卒乃營葬其母爲姊弟畢嫁娶移居宛平冀近父得遇知父蹤跡者也已而聞在瀋陽往從之既至無所遇慨然曰我不能徒返也塞外縱苦寒然商者麋至彼以利我以尋親畏道遠而徒返是視親不如利將何以子爲於是裂素緇書爲零丁標於背遂行兩年歷古北口熱河土城子諸險屢濱死不爲阻然卒無所遇最後至錦州禱於神祠甚哀有門而聽者趨告曰奚乃肖昌黎張存心耶存心僑昌黎故齊魯閒人也自言有妻子在鄉里足不良於行老矣不能歸也子盍求之如其言往詢諸土人言悉驗閭里

皆來觀曰此張存心子也孝子也然而爾父前死矣導之登北山坡得其冢迺召其弟淑啟同奉骨歸與母合葬更爲制服者三年世所傳張孝子事云爾近世稱孝者多在奇節宋以割股明以廬墓枌始者發於至情之莫遏而繼者相屬當世以爲習聞惟尋親得情之至正者卒鮮蓋其難也 國朝以尋親者先後得五人犯鋒鏑奉親歸者爲黃向堅奪父骨於苗獮者爲劉龍光尋之而終不遇者陸寅尋之而得其柩者彭孫貽得其墓者翁運標有淑旺而遂爲六向堅諸人皆累世詩書之澤淑旺顧操奇贏賈人子耳非有嘉言懿行爲漸漬其心激發其志氣卒能孤行其意歷九死而不悔以遂其父首邱之思以慰其母靈而無愧於向堅諸人所

爲夫拘儒牽於成議賈人以無所障蔽而克爲之其天全也賈人所爲高於拘儒所守則夫儒衣儒冠嗜利而忘本者皆賈人所不道至性不恆見於人儒而孝有黃向堅諸人賈而孝則有張淑旺人盡人子子盡當孝可以興矣傳孝子者於世系年歲多略予亦弗得而詳云

右事略朱筠撰

楊儀祖

揚子曰人取四重重言重行重貌重好言重則有法行重則有德貌重則有威好重則有觀又曰陽氣勉務物咸若其心而總其事覈人倫者恆準焉休甯州司馬忒庵楊君之爲人也少而警穎塾義英邁世父虞庠實先君器之而繼母金安人重懼其質之清羸也俾徙業虞庠君愀然曰汝重違母命就不入試愼母廢學君不獲已徙業而尤嗜學熟史乘時議畫古今成敗興替機要雖專門名史學者無以難之此所謂言重則有法者也君生四歲而母方安人卒九歲而父文學堅正公卒跳踊寢絕金安人勤撫之是歲饒寇滋擾奔竄榛箐不少離迺免君長而事金安人尤謹安人有